

Banda di Fisherman's Hut...

Buskeda extensivo pa Natalee no a duna resultado

ORANJESTAD (AAN): Autoridad ta splica, cu nan keto bay ta haciendo nan maximo esfuerzo pa resolve e caso di e estudiante Natalee Holloway procedente di Alabama, kende ya awe tin 16 dia desapareci.

Tur informe, delaster un tip cu drenta, ta worde averigua y na unda por tin un pista cu por indica cu por bay haya evidencia relaciona cu e caso aki, e team ta move pe.

Esaki tambe a socede Diamars merdia, ora cu tur Recherche involvi den e casc a worde yama pa regresa nan base na Bubali. Di eynan, masalmente hunto cu sosten di Bombero, Kustwacht, personal di DOW, fuera personal di FBI cu nan cacho special, a bay den e area di Fisherman's Hut unda Aruba Hi-Winds ta worde teni, y cu lo bira e futuro cas di Ritz-Carlton Resort.

E accion aki a pone tanto prensa local y internacional move pa e lugar, y di comienzo caba Polis hunto cu DOW a cuminsa pone baricada, y cera un area grandi hermeticamente, pa e investigadornan no worde stroba durante nan investigacion.

Na dado momento a bira poco dificil pa prensa sigui esaki di acerca cu a pone cu varios reportero a busca Speedboat of boto di piscador, pa for di laman por



Dos di e asina yama "Bloodhounds" di FBI, a participa den e buskeda nobo teni Diamars atardi den area di Fisherman's Hut.

capta e movecionnan di tera. Otronan a subi piso y dak di Marriott Aruba Resort. DIARIO a manda busca un boom-truck pa asina por cubri esaki di halto.

E cacho special di FBI a cana full e area aki, y a busca tambe e.o. den Casitanan di Piscador. Pero despues e enfoque principal a bira e Plas chikito cu tin net pazuid

di e ultimo casita.

A opta pa usa e Pomp poderoso di Cuerpo di Bombero, pa haci e Plas chikito bashi. A traha un mini-dam bao di e brug chikito, cu speranza cu por localiza evidencia cu tin di haber cu e investigacion. Pa basta ora esnan encarga cu e investigacion a listra cada meter buscando cualkier

obheto manera slof, paña of otro articulo cu por yuda autoridad riba un asina yama led pa link esaki na e caso cu a para bira un pesadia.

Un discjockey local a presenta su version cu nan tambe a busca rond y a haya un panty y tambe un preservativo den e area. Mirando cu e area aki ta worde usa hopi pa campamento, tin observadornan ta kere cu nan lo ta procedente di e temporada recién ey.

Mientras tanto, e tres hobennan deteni, principalmente Joran, ta worde sospecha di por sa algo, pero DIARIO a compronde cu e hoben Hulandes aki "no ta laga bay" of "e no sa nada kico por a pasa Natalee" despues cu el a aleha for di dje.

E pregunta grandi ta keda, kico a pasa Natalee anto? Varios teoria ta skeiro rond den pueblo y den prensa. Acaso e mucha muher a perde tur nocion di realidad e madrugada ey? E por a drenta laman? E por tabata bao influencia di alcohol of substancia? Kizas a surgi un discusion cu el a dicidi move for di e lugar sin e por sa unda e ta e momento ey.

Joran por sa pero e ta wanta duro. DIARIO a confirma cu e hoben Hulandes no kier bisa nada. Pues kico mas tin di kere den henter e asunto aki. Of por ta asina tambe cu Joran tabata bao di influencia cu e no por corda of exacto kico a tuma lugar despues.

No ta conoci si a tuma muestranan di sanger asina yama drugtest ya cu tecnologia por averigua si tin evidencia cu lo por deduci si el a usa of no.

Diamars ora solo a baha, autoridad a termina cu e buskeda grandi aki cu segun informe no a duna resultado te asina leu e informe na DIARIO.

Pero interrogacion lo bay bira mas pisa e proximo oranan. DIARIO a haya sa, cu te asina leu autoridad local a usa diferente tactica pa por saca afor di su declaracionnan di esnan deteni te na e momentonan aki. No ta conoci si por a pidi tambe sosten di e "criminologo" cual Cuerpo Policial tin na su disposicion, pa yuda e team tambe usando cierto metodo. Apesar cu tin di agrega, cu e oficialnan cu ta formando e team tin nan experiencia pa atende casonan pisa.